

20. okt.2016

Naalakkersuisut kingusinnerpaamik UKA2017-imi aalisarnermi raajat qaleruaannit kitosanimik tunisassiortumik pisortanit namminersortunillu pigineqartumik imminut akilersinnaasumik pilersitsinissamut toqqammaveqarnersoq misissuineramik saqqummiussinissaannut Inatsisartuni aalajangiiffigisassatut siunnersuut.
(Inatsisartunut ilaasortaq Peter Olsen, Inuit Ataqtigiit)

Siunnersuut Siumumiit imaattumik oqaaseqarfigissavarput, siunnersuuteqartorli aalajangiiffigisassatut siunnersuutaanut Siumumiit qutsavigaarput.

Nunatsinni pisuussutitta aningaasarsiutaanerisa annertusarneqartuarnissaat Siumumit pingaartitaraarput. Matumanilu Raajat qalipaasa igiinnarneqartartup atorluarnerullugu aningaasarsiutaanerunissaa anguniarneqarpoq, tamanna immini ajunngilluinnarpoq aammalu Naalakkersuisut siunniussaasa ilaannut tulluulluni, tassalu pisassiissutaasartunit pisarineqartartut tamakkiinerusumik aningaasarsiutinngortinneqarnissaat.

Naalakkersuisut akissutaanni eqqaaneqarpoq siunnersuuteqarnermi sanilliussineq pisoqaangaatsiartoq, Siumumiillu isumaqatigisinnaavarput tamanna, taamaakkaluartoq ullumikkut tamakkiisumik atorneqannginnerat aningaasarsiorfiusinnaanerallu sulii pisimanngilaq. Taamaattumik soqutiginnittoqarpat aallartitsisoqarusuppallu Siumumiik aallartisaasoqarnerani tapersorsorluarsinnaaqaarput.

Siumumi ilisimavarput soqutiginnittoqartoq, kisiannili perlukuinnaat aallaaviginagit aallartinniartarnek pilergineqanngitsoq malugisinnaallutigu, taamatullu aallartissagunik perlukut qaavisigut aalisagartassanik pissarsiniartarnerat aporfuilersartut ilangisaattut taaneqarsinnaapput. Tassami nunatsinni sineriaqqortuumi inoqarfiillu 74-iusut amerlanersaanni aalisartut aalisagartassaqaarnissaat qulakkeersimaniarneqartussaammat. Taamatut suliaqarusuttunut immikkut pisassiissuteqartarsinnaanerit tulluanngitsutut Siumumit isumaqaratta.

Suliffeqarfinnik taamatut isikkulinnik aallartittoqarsinnaappat aallartitserusuttunut immikkut siuarsaasinnaanerput periarfissaqarnersoq misissussallugu soqutigisinnaavarput, illuanillu siunnersuuteqartup pisortat piginneqataanissaannik ilanngussinera isumaqatiginngilarput. Namminersortulli atorluaanermik tunngaveqarlutik aallartitsisinnaanerit immikkut isiginialaarlugit aallartitsisoqarsinnaappat soqutigineruarpud.

Siunnersuutip qulequtaani ippinnartitaqarnerput pisortat piginneqataanissaannut tunngasoq isumaqatiginagu, namminersortulli aallartissinnaanerannik qulakkeerinnissinnaaneq naapiffigisinnaagutsigu oqaloqataaffigerusullutigu.

Taamatut oqaaseqarluta Ataatsimiititaliamut susassaqaartumut ingerlatipparpud.

Karl-Kristian Kruse
Siumut